



Broj/ Број : 02/2-50-1-13-45/06  
Sarajevo/ Сарајево : 26. 1. 2006.

## **Z A P I S N I K**

### **45. sjednice Komisije za vanjsku i trgovinsku politiku Doma naroda Parlamentarne skupštine BiH održane 25. 1. 2006.**

Četrdesetpetu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Vinko Radovanović, Velimir Jukić, Osman Brka i Ruža Stojanović, kao i Nevenka Savić, sekretar Komisije. Anto Spajić bio je opravdano odsutan.

Osim navedenih, sjednici su, u svojstvu predstavnika predlagača, prisustvovali: Bejta Delić iz Ministarstva finansija i trezora; Miodrag Pandurević iz Ministarstva civilnih poslova, Bakir Dautbašić iz Ministarstva sigurnosti, Mirko Šekara i Kojo Koprivica iz Ministarstva komunikacija i prometa, Jusuf Halilagić iz Ministarstva pravde; Amira Arifović i Radomir Bogdanović iz Ministarstva vanjskih poslova.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio sljedeći Dnevni red:

## **D N E V N I R E D**

1. Usvajanje Zapisnika sa 44. sjednice Komisije;
2. Prijedlog zakona o implementaciji Konvencije o zabrani razvoja, proizvodnje, gomilanja i upotrebe hemijskog oružja i o njihovom uništavanju – predlagač Vijeće ministara BiH;
3. Davanje saglasnosti za ratifikaciju Općeg sporazuma o privrednoj, investicionoj, tehničkoj, kulturnoj, sportskoj i omladinskoj saradnji između Vijeća ministara BiH i Vlade Kraljevine Saudijske Arabije – predlagač Predsjedništvo BiH;
4. Davanje saglasnosti za ratifikaciju Sporazuma o razvojnom kreditu (Projekat jačanja zdravstvenog sektora) između BiH i Međunarodne asocijacije za razvoj – predlagač Predsjedništvo BiH;

5. Davanje saglasnosti za ratifikaciju Sporazuma između Bosne i Hercegovine i Evropske unije o sigurnosnim procedurama za razmjenu povjerljivih podataka – predlagač Predsjedništvo BiH;
6. Davanje saglasnosti za ratifikaciju Sporazuma o dvojnem državljanstvu između BiH i Kraljevine Švedske – predlagač Predsjedništvo BiH;
7. Davanje saglasnosti za ratifikaciju Protokola o izmjeni Evropske konvencije o suzbijanju terorizma – predlagač Predsjedništvo BiH;
8. Davanje saglasnosti za ratifikaciju Protokola o izmjenama Konvencije o međunarodnom željezničkom prijevozu (COTIF) – predlagač Predsjedništvo BiH;
9. Izvještaj o radu Komisije za period 08. 07. – 20. 12. 2005. godine;
10. Plan rada Komisije za vanjsku i trgovinsku politiku u 2006. godini;
11. Tekuća pitanja.

Dnevni red je jednoglasno usvojen.

#### **Ad. 1. Usvajanje Zapisnika sa 44. sjednice Komisije;**

Zapisnik sa 44. sjednice Komisije jednoglasno je usvojen.

#### **Ad. 2. Prijedlog zakona o implementaciji Konvencije o zabrani razvoja, proizvodnje, gomilanja i upotrebe hemijskog oružja i o njegovom uništavanju – predlagač Vijeće ministara BiH**

Predsjedavajući je podsjetio članove Komisije da se o ovom Prijedlogu zakona raspravlja po drugi put na Komisiji. U raspravi na 44. sjednici Komisije, održanoj 20. 12. 2005. godine, zaključeno je da se zatraži od Kolegija Doma naroda produženje roka za dostavljanje izvještaja nadležne komisije, što je Kolegij odobrio.

Konstatirano je da je delegat Hasan Čengić uložio 3 amandmana na Prijedlog zakona. Zatim se prešlo na raspravu o amandmanima, kako slijedi:

##### **Amandman I**

U članu 15. stav (5), brišu se riječi „određeni broj“, a riječ „članova“ mijenja se i glasi „članovi“.

Amandman je jednoglasno usvojen.

##### **Amandman II**

U članu 17. alineja b) brišu se riječi „ili ministarstva odbrane entiteta“.

Amandman je jednoglasno usvojen.

##### **Amandman III**

U članu 27. riječ „mjesec“ zamjenjuje se riječima „dva mjeseca“.

Amandman je jednoglasno usvojen.

Komisija je jednoglasno prihvatila Prijedlog zakona sa usvojenim amandmanima i uputila ga u dalju parlamentarnu proceduru prema Domu naroda u skladu sa poslovnim odredbama.

### **Ad. 3. Davanje saglasnosti za ratifikaciju Općeg sporazuma o privrednoj, investicionoj, tehničkoj, kulturnoj, sportskoj i omladinskoj saradnji između Vijeća ministara BiH i Vlade Kraljevine Saudijske Arabije – predlagač Predsjedništvo BiH**

Predstavnik predlagača, g. Pandurević, govorio je u uvodnom izlaganju o Sporazumu istakavši da se radi o okvirnom sporazumu koji ima širok djelokrug primjene. On predstavlja osnovu na kojoj će se dalje razvijati privredna, trgovinska, investiciona, tehnička, kulturna, sportska i omladinska saradnja.

Nakon toga, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Općeg sporazuma.

### **Ad. 4. Davanje saglasnosti za ratifikaciju Sporazuma o razvojnom kreditu (Projekat jačanja zdravstvenog sektora) između BiH i Međunarodne asocijacije za razvoj – predlagač Predsjedništvo BiH**

Predstavnik predlagača, g-đa Delić, govorila je u uvodu o glavnim odredbama ovog kreditnog sporazuma, kao i o integralnom projektu ulaganja u zdravstvo, čiji je ovaj kreditni sporazum dio. Drugi dio paketa čini kredit Razvojne banke Vijeća Evrope, kao i grant sredstva Vlade Japana. G-đa Delić je zatim rekla da su Sporazum potpisali predsjednici entiteta, da je kredit kao takav uzet pod povoljnim uvjetima, niskom kamatnom stopom i grejs periodom od 10 godina. Nadležna ministarstva učestvovala su u kreiranju projektnog zadatka, a konsultantske usluge većim dijelom se odnose na domaće konsultante. U raspravi su učestvovali svi članovi Komisije. Preovladalo je mišljenje da je namjena sredstava, kako je data u Rasporedu 1, trebala biti drugačija (veliki procenat otpada na konsultantske usluge, obuku, operativne troškove).

Na kraju rasprave, članovi Komisije su sa 4 glasa „za“ i 1 glasom „suzdržanim“ odlučili da se rasprava nastavi na narednoj sjednici, s tim da se od Ministarstva finansija i trezora zatraži da za sljedeću sjednicu obezbijedi predstavnike pregovaračkog tima i/ili entiteta (nadležnih ministarstava zdravstva) koji će članovima Komisije dati precizne podatke o cijelom projektu (čiji je ovaj Sporazum dio), posebno namjeni sredstava iz ovog kredita, kao i o opravdanosti ovakvog kreditnog zaduživanja u zdravstvu.

### **Ad. 5. Davanje saglasnosti za ratifikaciju Sporazuma između Bosne i Hercegovine i Evropske unije o sigurnosnim procedurama za razmjenu povjerljivih podataka – predlagač Predsjedništvo BiH**

G. Dautbašić je u uvodnom izlaganju, u svojstvu predstavnika predlagača, objasnio da je ovaj Sporazum strateški za Bosnu i Hercegovinu, te da je postojala obaveza naše zemlje da se potpiše kako bi se omogućila dvosmjerna razmjena povjerljivih podataka, prije svega, sa NATO-m i EUROPOL-om. Predsjedavajući, g. Čengić, je pozdravio potpisivanje Sporazuma i primijetio da

Bosna i Hercegovina njegovim potpisivanjem postaje aktivni subjekat međunarodnih aktivnosti na ovom planu.

Nakon toga, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju sporazuma.

#### **Ad. 6. Davanje saglasnosti za ratifikaciju Sporazuma o dvojnem državljanstvu između BiH i Kraljevine Švedske – predlagač Predsjedništvo BiH**

G. Pandurević, u svojstvu predstavnika predlagača, istakao je da sporazum rješava problem između 60.000 i 70.000 građana Bosne i Hercegovine koji žive u Švedskoj i koji će sada moći dobiti švedsko državljanstvo, a da se prethodno ne odreknu svog. Ovo je prvi sporazum ovog tipa koji je potpisala Kraljevina Švedska. Predstavnici Bosne i Hercegovine sada po istom modelu sporazuma pregovaraju i sa predstavnicima Hrvatske.

Nakon rasprave, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju sporazuma.

#### **Ad. 7. Davanje saglasnosti za ratifikaciju Protokola o izmjeni Evropske konvencije o suzbijanju terorizma – predlagač Predsjedništvo BiH**

G. Dautbašić, u svojstvu predstavnika predlagača, pojasnio je motive koji su rukovodili zemlje članice Vijeća Evrope da dopune, ažuriraju i prate implementaciju Evropske konvencije o suzbijanju terorizma, što je učinjeno ovim Protokolom.

Nakon toga, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Protokola.

#### **Ad. 8. Davanje saglasnosti za ratifikaciju Protokola o izmjenama Konvencije o međunarodnom željezničkom prijevozu (COTIF) – predlagač Predsjedništvo BiH**

Predstavnik predlagača, g. Šekara, pojasnio je odredbe Protokola iz 1999. godine koji je ugradio političke, pravne i privredne promjene koje su se desile poslije 1980. godine, kada je potpisana Konvencija o međunarodnom prijevozu željeznicom.

Nakon toga, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Protokola.

#### **Ad. 9. Izvještaj o radu Komisije za period 08. 07. – 20. 12. 2005. godine**

Članovi Komisije jednoglasno su usvojili Izvještaj o radu Komisije i uputili ga ka Domu naroda u dalju proceduru.

#### **Ad. 10. Plan rada Komisije za vanjsku i trgovinsku politiku u 2006. godini**

Članovi Komisije jednoglasno su usvojili Plan rada Komisije u 2006. godini.

**Ad. 11. Tekuća pitanja**

Rasprava nije vođena.

Predsjedavajući Komisije  
Hasan Čengić